

Despues di reunion cu formador Eman

Delegacion di Aruba Bankers Association orguyoso di por duna su aporte



ORANJESTAD(AAN): Un delegacion di Aruba Bankers Association 'ABA' a reuni cu formador Eman y su team dialuna ultimo. Presidente di 'ABA' señora Marcelline

Richardson a bisa na su salida di cu e reunion a bay den bon ambiente.

"Nos ta orguyoso di a worde invita, sigur pasobra nos ta kere di ta e pilarnan primordial den brinda sosten na e sector financiero. Nos kier duna nos aporte na formador den su tarea cu el a haya di gobernador". Richardson a bisa cu e discusionnan a bay den forma hopi constructivo na unda nan a trece nan punto y proposicionnan dilanti.

Loke ta importante ta cu mester wak kico ta loke e comunidad kier.

Educacion ta un punto cu ABA kier enfoca riba dje. Aunke cu micro financiamiento no tabata un topico cu a worde discuti, ABA ta dispuesto pa sigui yuda

negoshinan chikito cu kier establece nan mes cu financiamiento. Señora Marcelline Richardson a bisa cu nan proposicionnan a worde bon ricibi.

"Ta bon di por sinta cu gobierno den un discusion habri y duna bo punto di bista den un ambiente relaha. Importante ta awor kico ta bay worde haci cu e informacion aki, tanto di parti di gobierno como di nos parti".

Richardson a subraya cu ABA kier sigui duna su sosten na gobierno mas tanto posibel. "Esaki ta djis un comienso. Nos lo topa back asina cu gobierno ta forma cu plan y accionnan mas concreto. Tur esaki pa un miho y mas fuerte Aruba".